

2013-imi Inatsisartut aningaasanut inatsisissaanni ukiunilu missingersuusiorfiusuni inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersumi § 45 aamma § 46 naapertorlugu illuutinik iluarsartuussinernut, allilerinernut imaluunniit pitsannorsaanermut ukiumut 2,3 mio. kr-inik immikkoortitsinissamik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut, taamaalilluni BSU pillugu peqqussummi § 4 naapertorlugu illuutillit 2013 aallarnerfigalugu illuutiminnik iluarsartuussinissamut pisortanit taperneqarsinnaanermik periarfissaqaqqilersinnaaqqullugit.

(Inatsisartuni ilaasortaq Anders Olsen, Siumut)

Akissuteqaat

(Ineqarnermut, Attaveqarnermut Angallannermullu Naalakkersuisoq)

Siullermeerneqarnera

2013-imi siunissamilu BSU-mit taarsigassarsillutik illuutilinnut illunik iluarsaassinermut, alliliinermut pitsannorsaanermulluunniit atugassanik ukiumut 2,3 mio. koruuninik immikkoortitsisalernissamut Inatsisartuni ilaasortaq Anders Olsen siunnersuuteqarneranut Naalakkersuisunit qutsavigaarput.

Kikkulluunniit inissianik najukkaminnik pigisaqalernissamut periarfissamik atuisimasut tapersorsorneqarnissaannut Naalakkersuisut taperseerusupput. Aningaasaliissutit killeqarnerat pissutigalugu aningaasat ineqarnermut qanoq iliorluni agguarneqassanersut eqqarsaatigilluarneqartariaqarpoq. BSU-mit taarsigassarsillutik illuutillit, nunatsinni najugaqartut amerlanertigut isertitakitsuusarmata, aammalu aningaasaqarnikkut sukannersunik atugaqarmata isertugaanngilaq. Taamaattumik BSU-mit taarsigassarsillutik illuutillit tapiissuteqartarnikkut illuutiminnik iluarsaassinissamut periarfissineqarnissaat, taamaalillutillu illunik najukkaminnik pitsaanerusumik aserfallatsaaliuisinnaanissaat Naalakkersuisut isumaqataaffigaat.

Ullumikkut kapitali 4 naapertorlugu taarsigassarsiat ingerlasut 1000-it missaaniipput, taamaattumillu BSU-mit taarsigassarsilluni illuutillit arlallit suli iluarsaassinissamut tapiiffigineqarnissamik pisariaqartitsinnaapput. Tamanna pissutigalugu kontomi pingaarnermi 87.72.23 Inissialioriternermut tapersiissutit, iluarsaassinissamut tapiissutit, 2,3 mio. koruunit pingaarnersiunermi immikkoortinneqarnissaannik Naalakkersuisut siunnerfeqarput. Kontomi pingaarnermi taarsigassarsialinnut, isertitakinnertik pissutigalugu taarsigassarsiaminnut ernianik akilersukkanillu akiliisinaanngitsunut, taamaattumillu kontop pingaarnerp 89.72.21 Inissialioriternermut tapersiissutit, iluarsartuussinissamut aamma immikkut ittumik aserfallatsaaliuinissamut taarsigassarsiarititat, ataani taarsigassarsitinneqarsinnaanngitsunut tapiissutit pineqarput.

A/S Inissiaatileqatigiiffik INI, BSU-mit taarsigassarsilluni illulianik aqutsisuusooq taarsigassarsiallit, inissialioriternermut tapersiissuteqartarneq pillugu Inatsisartut

peqqussutaat naapertorlugu akiligassanngortitanik akiitsullu sinnerinik
isumakkerinniffigineqarsimasut aalajangersimasunut qinnuteqaataat tunngavigalugit
qinnuteqartut illuini iluarsaassinissamut aamma immikkut ittumik aserfallatsaaliuinissamut
tapiissuteqarsinnaavoq.

Naalackersuisut taamatut oqaaseqarlutik aalajangiiffigisassatut siunnersuut taperserpaat,
aammalu 2013-imi ukiunilu missingersuusiorfiusuni 2,3 mio. koruunit siunertamut
pingaarnersiunerimi immikkoortinneqarnissaat siunnerfigalugu.